

沅

湘

耆

舊

集

沅湘耆舊集卷第一百五十八

新化鄧顯鶴湘臯編輯

湘陰左宗植仲基校訂

夏吏部恆 二十五首

恆字一卿攸人道光己丑進士改庶吉士散館改主事授吏部稽勲司主事轉本部員外郎有一卿遺稿一卿多才好學講求經濟時譽翕然吾友沈栗仲毛青垣尤亟稱之未竟其用而卒可惜也存詩不多無纖佻之習無叫囂之態攸與多詩人求之近時殆無有逾一卿者矣一卿繼室王瑞湘梅亦能詩早卒青垣爲撰墓志一卿死青垣復銘其

幽而栗仲爲書石二君復諄諄以其遺稿見示屬  
爲采擇庶幾不負死友者輯其詩輒爲之嬋媛太  
息也

述懷

富貴與利達有求適堪鄙文章與經濟無用那足齒煌煌  
聖賢業體用相表裏讀書苟有得可行亦可止我從田閒  
來倉卒備驅使雖無千祿懷竊抱素餐恥庶幾仕而學精  
心求治理

少小嬰憂患苦境靡不嘗負粟走千里餓驅輕四方浮雲  
態變滅眼過心輒忘惟餘窮傲骨歷鍊成堅剛豈無季布  
諾難飽方朔囊以我國窮故彌爲饑窶傷哀鴻徧郊澤和

手徒傍徨

感時

春風被郊野草木爭含萌萬綠共一色桃李舒其英豔冶  
悅時目嘒鳥若爲情幽人隱窗几濁醪聊獨情園林偶一  
涉遶徑花縱橫昨宵雷雨作今朝風日晴造化了無意弱  
卉難爲貞感茲消息理闇然謝春榮

宿炎陵奉聖寺

暝色起林薄鐘聲雲外飄遙睇窮幽奇攀陟毋乃勞禪房  
暫棲息捉松話深宵古皇不可作茲山終古高蘭若依前  
林松風散清濤月出照清澗煙水相周遭庭除奉東峯清  
光如可邀明當展遐矚呼吸通雲霄

飛香亭

萬木滴新綠衣袂沾微馨拾級陟斜磴花雨灑冥冥峯勢一束曠然開林垌從倚滌塵穢欲搆雲邊亭亭前俯秀野亭後張翠屏何當結構半夔魑不敢經崇巖起天末縹煙浮空青飛香渺何處露葉宵泠泠

詠豐臺

虛壑起笙鏞古樂聞清曉探奇興彌愜行露逐飛鳥怪石呈奇觀空攫龍爪何時窺雲下作勢翔天表築臺於其顛林泉相繚繞長天淩空濶澄潭俯浩淼農稻得餘潤秋來堪一飽前溪聞野謠煙火隔籬小

李西涯故宅

步屐遊西涯孤蒲漾積水蕭然雲樹閒成齋渺遺址平昔  
懷鄉型臨風企前軌公昔秉至性神童亦孝子有才繼騷  
雅正聲起衰靡許身歷四朝秉鈞逾一紀子輿信濡滯尹  
士竊詆訾伴食詠子規譖人工咀嚙豈知君子心盡瘁死  
則已悻悻亦何爲顧命猶在耳閭閻方鵠張朝士賤如蟻  
設從劉謝去善類竟誰倚鳳麟身猶存豺虎魄已覩况聞  
誅元惡文襄受指使自注公與楊應事與梁公同跡乃胡  
廣比遙遙二百年羣議雜譽毀 聖人明大義自注伏讀  
屋集中五古一篇褒讚忠良 耆儒仲公是葦棚薦馨香竹  
痛懲羣議公始無遺憾矣 張葦寮於西涯縣公像爲壽盛事  
舫集珠履自注朱石君太傅法時帆祭酒以六月九盛事  
會一時間風百世起我來挹餘芬斗山如在邇徘徊滙通

祠日落暮雲紫

秦良玉花槍歌

枯藤之柄八尺長苔痕齧鐵尖無鋼綠沈磨洗了無用胡  
爲寶此同干將入手稍覺有奇怪諦審款識生寒光石砧  
英雄馬家婦勇沈謀密忠且良自從播州起征伐娘子軍  
中兵氣揚紅崖青山屢奏捷仗此殺賊如屠羊功成不得  
受上賞朝中錦貝方披猖兄弟子姪盡豪俊幾也何害於  
戎行假令專閫秉鈇鉞羣醜豈得搖邊疆平台召對勞羊  
酒賜詩終遣還故鄉是時烽煙遍郊野西南狐鼠紛跳梁  
諸鎮孰如周遇吉督軍乃有楊嗣昌腐儒烏足計大事傷  
心羞同邵公亡夔州已陷蜀全失石砧猶然資保障此身

幸得全節義此檣終不遭毀傷回首河山經百戰橫衝直  
突誰禁當時危常作枕戈臥勢去那堪善刀藏手中磨弄  
二十載遺憾失刺李與張勲名不共滄桑變流傳寶物如  
旂常請君認取白桿帥名字勿使甯南壤

哀督師墓

十三陵樹荒荆綰黑風黃沙天爲赧哀督師墓城西隅望  
之鬱鬱淚潛潛書生何負於國哉邊城捍禦非常才兵家  
用閒亦常事恩讎嘗毀叢雜來雨不能爲之泣風不能爲  
之哀壞雲崩墜天陰霾健兒不健心腸摧千里勤王有如  
此國是紛紜可知矣太陽東出乾坤旋螳螂之臂車轍前  
公屈而死何幸焉不然如祖乃以二臣傳何如崇封義嶽



大道邊

長椿寺明劉孝純皇后畫像

九蓮曾傳慈聖眞禪關。仿古來長椿孝純昔祀奉先殿云。  
何飄轉偕風輪紅錦袈裟作佛相。祖姑孫婦默相向。縹金  
寶塔黯無光。鈴語風前倍惆悵。乾坤板蕩天步艱。思陵母  
子緣俱慳。生男若失青宮意。嗣位嗟違聖母顏。申懿王墳  
近何許。旁指西山黯秋雨。密呼中使付金錢。私祭誰知帝  
心苦。一片血誠付畫師。丹青染筆何淋漓。瀛國泣看諸相  
好。傳妃驚視舊容儀。龍旗鳳蓋翩來下。午門涕泣迎車駕。  
棧橋重新布几筵。七后同時心慰藉。靈來猶憫皇帝勞。迎  
去那顧豺狼嗥。外家都殉故君死。內殿誰收遺像逃。得非

龍女力呵護寶幢導引同龕住香火人天不了緣煙雨茫茫慶陸路紺宇琳宮深復深滄桑往事怕沈吟區區故紙豈長保劫火難燒仁孝心

### 范陽三烈士

孫夏峯明儒宗平生結識在朝野皆能行義行孤忠忠爲在魏義張鹿義以庇忠公與同是時逆閹亂朝政熾熾毒歆燠蒼穹一網將收六君子言者不敢撓其鋒公無尺寸柄吐氣如長虹苦心扶善類謀者鹿太公高陽樞輔古豪俊氣力尙可殲羣凶倉皇具疏請入覲豺嗥鼠泣熒宸聰天門訖蕩不可叫樞輔扼腕公計窮當其上書乞援手千里聞關張果中炎蒸豈惜奔馳苦髀肉先聞榜掠空密計

深謀馭金幣傾囊倒囊輸青銅可憐飛錢如雨亦何用但  
見析楊霍霍生悲風吁嗟乎乾坤瀕洞天蒙蒙忠臣義士  
難爲功如何左魏傳偏遺張鹿蹤惟餘兩廡黃劉座巍然  
並立孫夏峯

簡沈栗仲明府

聞道河陽宰將馳北上車風波還未息眠食近何如湘月  
隨孤枕燕雲斷尺書還鄉時有夢相訪洙泉居

老吏無冤獄深山有莠民不成蠶蠶毒得中風鸞身古鏡  
千尋澈精金百鍊純仙髯脫塵網早晚覲 楓宸

九日淨業湖酒樓登高

蓬山不得住何處更爲高擊劍心猶壯登樓興亦豪風流

追往昔詩酒屬吾曹引手招鸞鶴隨風下九臯

寄贈辰溪學博賀晴峯先生

攸與先哲半淪湮考獻徵文費討論

自注先生輯攷與詩鈔搜羅甚富

氣祇今同識劍知名從此息爭墩

自注元馮子振明彭澤省志皆誤入他縣

詩自可傳千古好事何關慰九原尙有前朝司馬憾要須

南董洗沈寃

自注明王侍郎禕附于謙傳史多誣詞先生曾擬辨正

舊邊詩

戍樓空打海東潮一代興衰一藩遼中葉便聞邊事棘蘄

疆曾指塞雲遙貂璫絡繹耕屯廢門戶紛爭將士驕宅土

漫誇成祖烈當年棄地本先搖

遼東

盧龍古塞陣雲屯複隘重關控薊門誰使大甯移戍守首

將邊地撤離樊將軍石畔哀笳競司馬營前畫角喧賴有  
叢臺環列柵不教戎馬突牆垣

前

遺疆莫問舊開平拔幟移屯獨石城虎檻鷹坊曾駐蹕花  
山萬峪自連營興甯可得聯聲勢土木何繇卷旆旌聽說  
萬全烽燧起郊圻無事亦神驚

宣府

屏藩底事棄豐州東勝輕捐一運籌河套遂看長養寇雲  
中從此急防秋黑沙黯濟軍威肅白道逶迤殺氣適能使  
邊城安互市狼煙三面一齊收

大同

陰山烽火接陞山幾見邊庭羽檄閑河北地形雄四塞漠  
南天險屹三關重臣最要綜名實朔騎安能任往還千里  
太行憑一覽偏頭孤立亂雲閒

山西

不思復套謀接套且爲防邊策徙邊雞鹿塞高形勢壯駱  
駝城在堞樓懸可憐無地容耕牧長望飛芻轉慶延借問  
王余移壁壘何如飛將降從天

榆林

賀蘭層嶂鬱嵯峨倚險憑看五衛羅地領三秦橫絕塞渠  
分百道引長河馬騰清水驚沙撲鬼哭靈州澹月趕若使  
松山屯戍密應教關隴息珣戈

寧夏

盤山峽石隘重重北地分疆扼要衝八郡咽喉開重鎮三  
邊犄角靖妖烽縱憑戍卒時堪調可念軍儲歲不供豫望  
城頭頻悵望水泉深處好營農

固原

歌聲淒楚奏伊涼白草黃沙古戰場哈密孰教移內地土  
番何計縛名王英雄慷慨籌邊策朝宇依違取遠方弱水

爲能洗兵革玉關搔首浩茫茫

甘肅

鄭漁仲夾漈山讀書圖

夾漈孤雲自往還擁書端坐翠微閒鴻儒目力窮今古良  
史心期軼馬班著作已成堪問世朝廷雖小肯投閒心交  
雖有林時隱觸忤神姦蚤閉關

暑中赴鄒坐肩輿上隨有所得卽爲韻語乃用前寄  
湘梅詩韻以足成之

旅館孤衾夢不安碧天如洗曉星闌辭家我向輕王粲辦  
事人今識呂端前路不愁知己少暑天翻念僕夫難荒荒  
野市無兼味塵飯藜羹餉午餐

挂社前歲過平湖應識今吾卽故吾泛泛此身隨近物悠

悠行路問征夫  
舁樓底羨培風鳥  
高論曾驚立雪徒  
此去鱣堂陰滿座  
不知薪木勝前無

王吏部寅 六首

寅原名筠號琴垞武陵人道光己丑進士改庶吉  
士散館改吏部主事考取軍機章京有琴垞詩草  
琴垞與余同出咸寧許先生門未相識也往從咸  
寧處稍稍見其詩後聞其官部郎入樞直頗爲吏  
事所苦不復唱渭城矣余客朗時琴垞已卒屢覓  
其遺稿不得是集將刊成友人始寄到近體詩數  
首聊爲補入

由荊州至襄陽舟中作



莽莽平沙岸千秋戰壘空江山餘霸氣割據見英雄明月  
無飛鵲寒煙有去鴻銅絃兼鐵板誰唱大江東

呂堰驛題壁

荆襄行未幾風景又旣輪馬老諳投店鴉馴喜傍人客程  
京洛遠鄉夢楚山頻已近重陽日黃花笑此身

寒雁

朔風吹健翮萬里度關河故侶雲霄遠前途雨雪多哀音  
訴明月清影鏡澄波尙有爲儀用拚飛慎網羅

寒雅

墨點不成行低飛凍翅張荒原殘月落古廟斷煙涼候樹  
翔天末居然負日光玉顏無限思看汝出昭陽

按已上二詩亦  
見夏一卿集

夜泊衡山縣

祝融形勝望模餉燈火微明檣棹初殘月落如將去客名  
山奇似未窺書灘聲攪夢鷗眠怯峯影淩寒雁過疏惆悵  
夜闌更漏永臥遊空憶鄴侯居

重遊嶽麓有感

鼓櫓潭州自往還隨風又到嶽峯閒一篇枯樹無人賞寂  
寞江南庾子山

方兵部大淳 四首

大淳字希程號稼軒巴陵人道光癸巳進士授兵  
部職方司主事考取軍機章京有稼軒草希程通

籍年甫踰冠銳意經世之學官兵部時發職方司  
所藏各直省地輿圖及各省方志於地形險易及  
漕儲水利兵防諸大政悉心講求欲薈萃成一書  
未就而卒中朝諸老多稱惜之

世故

世故忌太深聲名忌太早嗟我亦何爲勞心常草草平生  
千里志此事何日了安得駕雲車快意遊蓬島舉杯強一  
醉搔首問蒼昊

得家書

東風吹我到幽燕芳草天涯又一年聞道雁來眉亦展可  
堪鵲望眼將穿三秋塞北羈愁夜五月湘南瘴鄉天爲報

平安逢驛使放歌狂醉且酣眠

桐鄉叔祖以詩寄和因疊前韻

我居薊北君幽燕相思兩地對牀眠工愁便是三生孽命  
中須教七札穿造物何心能厄我文章有命只憑天故人  
若問休文訊塞上吹笳又一年

遷安大饑竹生叔父創議捐振因作詩以紀事再疊  
前韻

嗟爾流民竟如此正是黃楊厄閏年

自注本年閏九月

奇情忽夢

飯甑溢苦况應憐布被穿惟有實心能任事從知大力可  
回天使君活我起溝瘠野老歡呼共醉眠

周縣令振之四首

沅湘耆舊集

卷第百五十八

十

振之字仲甫益陽人道光乙未進士分發河南卽  
用知縣先後署虞城商城二年病歿有異政去虞  
之日虞人號泣追送路爲之塞其病也商人問疾  
饋藥無虛日歿後發喪制服請入名宦祠仲甫恂  
恂經生初膺民社又非久於其位而得民如此吁  
異矣其友湘陰左宗棠季高屬余志其墓而尙未  
得爲也仲甫不多作詩無專集可傳此其絕筆也

臨終詩

博得清官譽勞勞賸此身階前無寸土地下有三人

自注  
聞先

君計日虞兒殤逝今

予已不能起矣傷哉吾命終何蹇此情難具陳五中遺憾

永抱慮共高親

愛我虞民切此風何最淳一年期促促

自往署虞城十一月

千里問

頻頻師友文章在聲名日月新記來郊送日父老泣沾巾

未到商城久傷心值此憂

自注丙申十一月到商城今四月以丁憂解任

官民同

骨肉休戚共歡愁告乏來困助聞災饋藥稠蒼生負期許  
千載憾悠悠

一別四年久天涯兩弟兄文章抱今古忠愛論生平得此

家庭信何堪手足情終期立門戶夙夜勵前程

梅禮部鍾澍

二十四首

鍾澍字霖生寧鄉人道光戊戌進士改庶吉士散

館改主事授禮部儀制司主事有蘚花崖詩文章

霖生生而穎異師事同縣馬秋耘學博維藩弱冠

卽舉於鄉文名赫然困公車二十載久之始就試  
學正官國子監至成進士入翰林年四十矣館中  
諸老翁然以詞壇老宿相推散館改部方其憐惜  
霖生夷然不以爲意也改官後遺余手書數千言  
以禮曹清閑可銳意著述爲幸未久卽歸道山矣  
傷哉余與霖生前後同出咸寧許先生門又辱與  
秋耘交最厚故霖生與余兄弟有鍼芥之契每見  
必以詩文相質俟交許可而後已其見信如此今  
霖生逝矣吾兄墓有宿草秋耘一官落拓遠在千  
里外無由繼見荒江老屋塊然獨處輯其遺稿不  
禁爲之歔歔泣下不能已也霖生詩尙多聞其臨

危時以授湘潭黎月橋侍御光曙遠不可致姑就  
其子鏡源所寄一冊爲錄存數首云

長安一首謝陶尚書

長安人海中擾擾厭鈴馱暈羶朱戶羅絲竹高樓和魏戟  
朝貴家四方競輸貨輦壁而輿金詞曰弔與賀填委權要  
門安肯犒寒餓偃蹇國子師幽屏與時左出門跨蹇驢入  
門炊冷銚東鄰有富兒高廩溢黃稗似亦許我貸我辭不  
肯懦天憐且不乞我窮以是坐淵然澄古心緇塵不能浣  
車馬客不來鎖日閉門臥已分老鹽齏誰猶念轅軻今朝  
風雪中一騎忽枉過打門喧窮巷尺書光落座春風一披  
拂暖氣釋寒睡公也富經綸今之周召佐萬閒庇天下羣



託帡幪大豈惟愛一士一士惠所播因風致謝詞短歌操  
楚些

題賀柘農侍御城南送別圖

鳳鳴中韶鈞得氣乃引吭霜鏐含清秋應節發奇響其鏘  
動以時聽者神震蕩至人鑒物理深默澄所養及其闢爲  
言四海推而放况乃位臺諫分宜諍慨慷誨納忱乃將言  
伸道不枉方今民物安禾黍歲豐穰然而宵旰心時時企  
忠讜昨聞海水腥蛟鼉幻魍魎出沒恣狡獪商帆戒來往  
雖偶萌蹊蓋全體關痛癢國家有大計意量周窮廣言者  
據細故響纖鳴爲盜豈不快彈射毋乃傷文網公也富奇  
貴丰裁爲世仰重騎鐵驄出鬢髮猶矚曩天風高可呼

魏園闔敞回首湘城南流風被吾黨爲語山中人莫遽問  
歸槩請看出岫雲爲霖徧天壤

鄧湘臯丈賜讀南村詩集賦此奉謝時將遊武昌卽  
以誌別

南村先生詩壇將海內風騷健提唱賤子早歲讀翁詩面  
卽未謀心則仰人生知己重感恩與翁同出成連門瑤琴  
海上杳然逝至今衣鉢翁能存昨與翁相見贈我詩一卷  
我讀翁詩疑四垂如逢麴車與鹽梅誦之萬遍得其意殆  
與古人相追陪古人豈僅爲詩人然而有作則必傳悲愉  
諷刺出至性此義昉之三百篇風雅而還騷繼起涕泗斑  
斑痕在紙忠義激而爲至文其他贈答皆有以魏晉以降

及唐宋詩可傳者類如此後人沿襲昧此意翦刻塗澤逞妍媚衣冠優孟失真形塊礪川庖非至味如翁豈特擅文詞動有所觸發爲詩聲滿天地格金石歌者歡喜泣者悲翁之盛業可不朽後有繼者知爲誰鯁生年少江湖遊放眼將登黃鶴樓便欲把翁詩卷去一瓢春水下扁舟黃州竹子武昌樹蒼茫無限懷人處思翁祇合黃金鑄

題陶雲汀宮保御書印心石屋冊子

皇帝垂拱朝諸侯龍旂象笏瞻冕旒東南重臣擁旄至雪花十月飛貂裘平明召對明光裏步出金門移日晷屢虛前席問蒼生還向卿家詢井里拜手稽首臣敢言臣家住近資江水資水東流入洞庭流經臣里忽淵亭蒼崖斗劈

作門立潭心巨石銜瓏玲清宜如水堅如石先人感此垂  
心型結屋門臨春水綠趨庭書擁夜鐙青東風送客長安  
去記別山中讀書處宦轍茫茫十七年夢魂夜識瀟湘路  
蝸廬門迳滿蒿萊馬鬣阡原荒宰樹未報 君王高厚恩  
敢陳垂老歸田疏願因閱武出潯陽暫乞還山省邱墓

天子臨軒屢頒頤褒忠教孝湛恩施 宸翰親揮四大字

乾坤元氣何淋漓星精日芒亘雲漢鸞鳳泊蟠蛟螭禁  
苑鐘鳴宣玉旨御爐煙拂捧天題分班鵷鷺環觀地拜賜  
夔龍舞蹈時我聞獨樂園中叟憂時歸洛澆杯酒贊皇豪  
闊平泉莊遭時祇自娛花柳主聖臣賢際會難安得虹題  
誇不朽又聞飛白賜宋臣玉堂之署非臣門 先皇駐

蹕曾南幸西溪一拜天書恩公膺寵異更稠疊璽寶鉅細  
光璘斌風雲遇合逾前哲金石精誠動 聖人東南百郡  
稱繁劇鹽鐵宜防資泊策頻年水滂困江淮嗷嗷鴻雁鳴  
中澤瘡痍萬戶待生全涸蠹千重勞洗滌狐鳴梟噪肆旁  
撓老臣憂國鬢眉白 帝心獨鑒臣心堅虬蟬撼樹嗟徒  
然丹枕上徹重霄日赤手孤撐半壁天狼胡四海驚疑事  
魚水千秋契合緣旌旗風雨還湘浦故國秋光黃菊圃一  
月酣陪父老遊廿年重聽鄉鄰語來尋老屋石門潭童時  
舊事猶能數擘窠大筆謹摩崖靈龜最屬豐碑樹抱負隆  
中舊草廬勳名嶺表新銅柱丈夫得志快金懸造化無功  
期石補君不見嶽麓山頭 屋碑萬古矗天齊岫嶠

舟發襄陽

挂席下襄陽，蒼茫望武昌。  
遠煙江樹黑，初月海天黃。  
葦外颯秋響，濤頭生夜涼。  
白鷗閒笑客，泥爪爲誰忙。

寄賀美恆大令

自注：美恆官陝西，以西事進饒，至邊大吏留之於軍中。

西望指櫓槍，窮荒未解兵。  
男兒行絕塞，戎事贊書生。  
宦轍迷秦隴，天戈肅漢營。  
樓蘭擒早晚，竚汝寄邊聲。

由安州抵雲夢

平原看不極，去去信征驍。  
山抱村關遠，天圍夢澤低。  
夕陽楓葉老，秋雨麥苗齊。  
又欲投鞭宿，孤城潁水西。

習家池

綠峴欹斜幾，坂經瞥看臺。  
樹做瓏玲一泓寒，水碧於酒三

面好峯青到亭漢晉河山誰保障春秋俎豆共芳馨自注池上

有祠祀山公簡習公於今誰是高陽侶莫漫池頭醉不醒自注

### 寒溪寺

剡卻一峯纔著寺巋然拓向西山東寒泉如雪漱太古老

樹著霜皴舊紅度水虬藤蟠岸出自注為遠公橋隔林人語響山

空讀書都讀督渺何處松徑蕭蕭萬葉風自注寺額闕松哇廣歛許寺僧

指為陶侃讀書處

### 九曲亭

纔將赤壁兩篇讀又向高亭九曲攀終古蘇家此兄弟各

餘文字傾江山自注亭鐫蘇子由所著記層梯滑迫斷崖峭一笠尖撐

空翠環大筆於今幾枝在紛紛濡墨弄楹間

奉陪賀柘農侍御應城水亭小飲卽席次壁閒韻

人閒何處置禪牀漫逐紅塵踏軟香消盡雪泥難駐爪戰

餘旗鼓怯登場官慈似佛航同渡人淡如花言共忘

自注座中

菊又報星槎留不得挂帆今想趁風長

自注自德安抵應城皆以輿馬由此

達漢陽始以舟行

十月小盡日與幕中同人登赤壁謁蘇文忠祠

西塞蒼蒼吞遠勢東流滾滾捲長空臨臯十月天將雪赤

壁重遊我後公終古江山誰管領乾坤文字幾宗工天堯

有客空相對惆悵當年玉局翁

寄鄧湘臯丈

感恩知己今何在西望蒼茫哭老成

自注余與先生後先出許遠舫師門下師



卒於苗疆司馬官舍距今十餘年矣

幾輩零星餘弟子千秋薪火付先生醉

登壇玷中原小老牘文章海內行並世況兼桑梓託那禁  
低首向宣城

寄李少青學博

搔首蒼茫欲問天百年心事到杯前  
寥寥湖海存知己衮衮蓬萊半少年  
不信文章憎命達若論時事要才肩  
長安畢竟花開好可使台州滯鄭虔

述懷

客子歸來暮雪天勞勞身世感塵緣  
雙眸識字羸深患萬事驚人逼壯年  
菽水供常慙儉薄池塘夢總盼纏綿  
伯兄漸老諸兒弱門戶何由討萬全

落落青衫痕，可笑堂堂白日影。還驚十年久已逢飄慣，一錯何能鐵鑄成。湖海未須判浪跡，詩書終不誤平生昂昂。玉茗孫猶在，好趁吟哦共短檠。

重陽後六日偕何曉峯登安州城樓

重陽高會負今年，爲補登臨放眼便。浦口隘奔千澗水，平原低界四圍天。故園芳訊遲叢菊，客邸浮蹤促杲蓮。莫向西風訴飄泊，此閒曾著酒中仙。

自注白兆山爲李白讀書處

連日守風舟中新盡舟子以舊樂代之酬以詩

成器未應甘世外，負材原不因風塵。卻憐鼎鼐調和日，已是江湖閱歷身。知己賞音桐入爨，人閒歷劫火傳薪。卽今一飯叨君飽，餘力猶堪振瘠貧。

題鄧雲渠先生松竹園雅集圖兼呈湘臯丈

君家兄弟今逸老到處園林杖履新  
白髮朱顏引童稚蒼官青士相主賓  
秋鐙聽雨平生約故國看山自在身  
我向天涯賦離別春園桃李獨傷神

和湯敦甫先生

金釧

奉

命教習庶吉士次海甯陳

文簡公韻

石渠講論重通經彥士胸羅廿八星  
翰苑自來儲宰輔儒臣從古樹儀型  
玉堂賜字畱飛白銀管編年照汗青  
聖代育材深雨露新看飛鳳集槐廳

清時著頌式

羣英但願瞻韓萬戶輕槐市舊深知已感自

注

鍾對癸巳試太

學學正官受知蘭臺新荷樹人情文章八代狂瀾挽品望

三霄曠日明  
大臣幸懸繩  
盟在翻翻誰  
不受弓檠

公門桃李附  
芳枝回首名  
場觸舊思十  
度春風花落  
日廿

年秋雨夢歸  
時

自注鍾嶺十赴禮部  
試前後置京師廿年

分陰每惜駒  
光逝寸

步從教蟻磨  
移畢竟羽毛  
豐滿未慢隨  
仙侶到蓬池

同譜何人是  
謫仙欲從兜  
率證前緣芝  
蘭誼許知心  
契楨  
幹材求節日  
堅學道共隨  
師保後匡時  
都仗老成先  
試看  
綸閣新猷煥  
葉籥陰陽妙  
幹旋

沅湘耆舊集  
卷第一百五十八終

沅湘耆舊集卷第一百五十九

新化鄧顯鶴湘臯編輯

湘陰左崇植仲基校訂

陳吏部起詩

六十五首

起詩字雲心郴州人道光己丑進士授吏部主事  
升本部員外郎記名御史有雲心遺稿雲心少負  
才譽與其弟起書起禮輩齊名雲心官吏部尤有  
聲未竟其用可惜也此集刊成其弟葵心起樂寄  
示遺稿一冊亟爲補錄雲心詩尙多俟得其全稿  
當爲增入續集也

秋山

秋山明夕陽適與吾心會溪童荷篠還柴扉掩餘靄雞犬  
暮相親松杉靜猶曠村鐘隔牖窺書聲寒煙外浩歌蘿徑  
歸盪胸滌塵壒

孤舟

蕭條江上月空明江上秋秋心不可掇飛雲千里浮渺然  
望江月蒼然思故邱萬籟俱清真吾亦在孤舟

秋夜用鮑照韻

在家苦頗異離家苦寂寞朝覲南飛鴻暮比投林雀雖嗟  
人事難尚共天倫樂江湖猶比隣何必專邱壑用臧綽雖  
雄中孚感鳴鶴坐久月露寒宵深曙星落耿耿數漁燈蕭  
蕭響林樾秋半月離弦夜靜天如幕斗北牛在東甯可共

杯酌長嘯迴滄溟毋使憂來鍊

早發用邛遲旦發漁浦潭韻

霧薄日未暎風定帆猶颺曉色隱孤楂曙雲起遙嶂夢醒  
天乍明殘星炯在望鄙事少賤能高秋此難狀但聞人語  
喧稍覺江波漲平生行路難薄命危檣傍聊歡病起身天  
地增清曠

仙人墓

雨過灘聲雄雲生風影伏陽崖閼靈籟陰風疎落木山石  
圍如城蒿眼蜂攢簇頂藏神仙蛻我我古冠服死者安足  
論山靈名永馥我有不朽具變遷笑陵谷慷慨擊短楫長  
歌以當哭



飲酒擬陶

生死若循環百歲復何之及今不爲歡奈此春風時甯知  
桑榆景感愴乃在茲達人識機先愚者祇自知但言一樽  
酒一樽誰久持朝暉開雲霧遙見千萬山飛鳥和且歌始  
知天無言高卧北窗下悠然羲皇年吾心祇自知爲樂當  
誰傳

精衛銜木石翩翩海上飛問君胡爲爾言之令人悲手口  
何拮据毛羽相因依萬物各有家嗟我安適歸高堂雙白  
髮別時已就衰茲事雖無成茲理不可違

阮公性耽酒我我晉代英雖無經世畧酣嬉適我情鳴琴  
緬采薇興至時獨傾不賴咏懷篇安能以酒鳴禮樂待百

年咄哉魯兩生

移家草澤居眷此葑菲姿朝朝行采歸珍若珊瑚枝根株  
雖不淺柯葉自離奇路旁見者笑采此將奚爲但言行吾  
意勿爲塵鞅羈

柴門設已久自闔亦自開好風一以至悠然緬無懷勿言  
酒可止吾心不可乖束髮耽元妙空林結幽棲視彼要路  
津藐若濁水泥所貴求吾樂焉知世不諧夕陽三徑間時  
時炊煙迷童穉行和歌知予荷鋤回

淮南頗好道叢桂生其宅丹成舍之逝雞犬無畱跡豈知  
一杯酒賢於壽累百歡娛願日長沉憂令髮白仙人不可  
期盡醉復奚恤

東陵五色瓜風霜亦屢經種此當奚爲瓜蔓盈前庭蟋蟀  
何其哀格格籬間鳴慎勿傷我根且以寄我情

垂釣長江邊日夕何所得悠悠身後名寂寂虛生白陶公  
太解事致身介通塞白衣空山中高論家與國何如謝車  
馬沉冥守辛默

陶公令彭澤非爲求祿仕聞有斗酒資且以謝知己歸來  
復乞食無榮亦無耻雖無千金報厚意在鄰里故人邀我  
飲一醉僦千紀我欲往從之妻孥無我止風波有險巇忠  
信安足恃

飲酒本無量量亦自有真所喜吾家醞澄清返其淳客言  
武陵溪桃花四時新漁子偶啓關心知爲避秦與子昧相

知胡爲枉光塵借問此何時展轉通殷勤樽酒越阡陌恍  
若平生親往者成千秋來者誰問津彷彿吾醉鄉一笑歛  
冠巾吾言多眞率不堪語外人

耒陽縣

江空霜露寒雁影暮徘徊客舟如鳬鷺搖曳耒水湄傍人  
夜相語謂予失意歸再拜龐公廟中心愴以悲雲霄有毛  
羽鳳雛乃塗泥豁達魚水歡惆悵梁父詞終竟安補哉天  
心吁可悲懷古情慷慨扣舷歌莫哀秋風麋子城波濤蒼  
莽馳

七里灘用謝靈運七里瀨韻

畏途獲安瀾危轍供清眺洲空草木秋灘減石稜峭日入

月未升長天閤靈曜浮生足憂樂靜觀還坐嘯風波此展  
經遊戲探道妙靜念今賞勝難免前疎誚悠悠無心雲了  
了直鉤釣探奇非預謀惠莊庶同調

秋懷用謝惠連韻答廖春泉

雖無行路難頗有疾疾患藥石慎周防眠起戒朝晏望遠  
白雲飛懷人曉星爛早聽汝南雞暮盼衡陽雁病骨宜秋  
衣歸思先風幔遲速會有程百里九十半成古名屢問舟  
行程莫算偏仄意亦安坐立無敢慢平生緬固窮年少輕  
仕宦文章費未孤泉石性所玩泮水有逢迎江山托賤翰  
勞君一尺書慰我方寸亂後懦感瞿瞿前誓申旦旦城郭  
萬人煙金碧各焜煥夢遊不可追撫枕夜長嘆黽勉報平

安轉與寄親串

寄廖春泉

孤鶴野田閒  
早稻美可茹  
照影清江流  
哀哀求其侶  
目視片雲飛  
施翮不能舉  
遠煙在青松  
細籟聞樵斧  
之子胡不來  
蒼茫眺平楚

不寐懷春泉

月光如麗人一室自來往  
幽人清無眠覺有天外想  
忽聞環珮聲明月來虛幌  
微風颺簾鉤危絃拂餘響  
思君此何涯知君亦孤賞

寄李希連

登高俯四野徘徊觀太虛  
好月盈盈來形影與之俱  
此心

此光明眞實非暫娛憂喜一無端曠若我生初誠願故人  
知如與故人居故人有元悟圓明月不如

續和程春海學使北湖懷古原韻

奇哉蟾蜍蝕月影不共虛全陰五嶺南來祇有張十一  
騰如轆轤轉捩纒見否謫柳程師舉卽見應亦縮其脰  
夫君說搆此不撓相與湖遊攀菱苻岸火又魚春招要月  
波照人夜癯瘠滌瑕蕩垢上道難孤笑羣憂彈指頃公云  
柔舌無缺落意學聲牙帶筭筭能言者以言爲憂憂在  
人心非人境同官劉柳不同譴看蚤作網蠱飛皿儻以  
私黨較瘴瘴甯避新懦趨前猛匪親豈朋詞頗微旣往  
宜懲正有胥劉柳可責安可倫一猶女郎一忠鯁至今  
湖與李公歎陵

谷雀鬼蠻荒幸覆巢毀卵鴻入冥敝甕羸瓶泉惻井生命  
磨蝎詫甬口當塗宦孽誰識省泰山童赭神秀推北斗豁  
落元精耿狐鳴梟噪國空虛鉅封剝鎖黨驕逞雲開公昔  
衡局斂髮披吾欲天闢請血面招魂巫陽哀幽夢感人湘  
靈靚恩波未報雙鬢霜猿鳥無聲一葉靜十生九死得逢  
楚殘年衰朽還萍梗萬里歸來此懷古孤生羶穠家幽屏  
登堂撫碑字如斗買田爲祭舍有丙鳳韶鏘蔚神爽翩荔  
蕉丹黃祠雲冷當時從遊有孟瑄請把芙蓉例桃杏並以  
張李配以孟此邦之人託公永古人已往如可呼借公筆  
力發豪騁

文昌閣



招提試一過梵鐘清若何白雲不生處飛鳥相與歌門外  
水聲靜塵中機事多會須狎鷗鷺還復向煙蘿

過寒虛園

高雲晚爭出寒鳥寂無喧偶看山前雪來過煙際村  
簷風  
通白晝寒日易黃昏得與元真子心期一細論

夜宿古寺不寐

寥寥神獨覺了了紙窗明寒意肅然至人天一氣清室虛  
鐙影靜夜久道心生此際聞鐘梵泠泠內省情

月夜

孤舟如野雁去去不知勞薄暮雨催暑寒風松作濤江煙  
灘響隔山月夜深高今夕還家夢應憐折大刀

樟木市

落葉積如許沿江一帶明夕陽多在野古樹不知名隔水  
見鐙影懷人聞雁聲澄波平似鑑爲照我心清

長沙市樓別魏默深

西風吹木葉與汝倚闌干斗酒一爲別湘江終古寒家山  
夢中碧銀漢夜深寬莫遣音書寂南飛有羽翰

東山風雨夜作

庭樹寂無語蕭然清更幽離腸一以轉風雨聲颼颼人靜  
夢猶寤夜寒春似秋未能聽落木已是十分愁

渚沱河

蹄鐵亂渚沱風沙咽浩歌英雄古來有飢餓路邊多地氣

中原薄蒼生責望苛星辰滿空濶驚起夜如何

舟行雜咏

楚水一泓碧楚山終古寒櫓聲搖客夢帆影聚危灘倚劍  
不能舞離家亦大難老親真健飯念我也辛酸

市有魚鹽氣江空舴艋舟水乾沙露面木落石當頭野泊  
雞豚社他鄉煙雨秋雁鴻飛去盡一一不勝愁

落日朱亭外青天映錦紋灘聲寒散雪樹影遠埋雲楚俗  
多神鬼村巫薦苾苾誰會擷蘭杜一爲弔湘君

孤櫂來荒汊秋江足怒濤水雲添浪重灘石挾船高終夜  
風相虐危途氣自豪狂歌吾不敢把酒讀離騷

舟行順風

山勢定相爭羣山送復迎舟如飛弩去沙欲上灘行風正  
帆常側船孤浪易橫畏途吾已慣趺坐說無生

秋感

讀書衡嶽外清嘯對蛟螭日落韓公廟秋深義帝陵蠻雲  
濃不壞瘴霧曉還凝鴻鵠蒼茫外嗟余百一非

聞道邊庭戍孤臣出塞多玉門關外月哀怨枕琬戈笳吹  
沈沙磧寒烽落大河相思萬里外知否淚滂沱

江北蘼蕪路湘妃玉珮珊人經三月別月共一天寒雁影  
長空渺梅花短笛殘西風吹翠袖何處倚闌干

懷魏默深

去年冬及盡遠道有雙魚孤館仍風雨天涯少尺書一樽

殘臘酒半畝故鄉廬只此和妻子寒宵對綺疏

除夕

遠鐘催暝色欲暝復低徊送客一庭雪懷人千里梅  
語言能自遣風雨亦多哀愁思深難盡依然去又來

懷希蓮

澹煙籠曉色鳥語隔窗紗二月春寒甚牆陰見李花  
意行看雲影好友在天涯昨得尺書至歸程萬里賒

九日

九日他鄉菊摩挲瘦影多一樽對風雨孤劍爲悲歌  
水落魚龍冷天高鴻雁過眼中人健在不必感蹉跎

登長沙南城樓

發狂吟撫太阿身外道途傷坎壈村中談笑老羲娥他時  
憶別成蕭瑟青眼相看奈爾何

夜坐獨酌

月臨寒渚遠船清畫出清宵望遠情湘水如煙空處好家  
山一碧夢中明酒畱藥味難辭苦衣有啼痕未忍更忽憶  
行時重握手雪花簾外靜無聲

和黎月橋岳陽樓詩

落日登臨望渺漫遠山如髻鏡中看湘君一去暮雲碧春  
水初生湖雁寒酒到神仙醒最易詩經李杜和原難羨魚  
垂釣還今日江淨煙空且倚闌

尊前

夜色如巖歷短篷酒龍詩虎各英雄尊前舊雨年皆壯秋  
後新詞句易工蛛已無絲營敗網人惟有淚哭西風到家  
難趁黃花節冷落寒山菊一叢

雪夜感舊

熏爐冷燼賸餘香寒入層幃更漏長水落魚叉聞欸乃鐙  
明鴨柵照郎當沉疴已辦三年艾生計難謀十畝桑一事  
此中堪慰藉故鄉可老不他鄉

感事

藥煙已斷疾難瘳十月新寒淺似秋客瘦西風聞雁夕鐙  
殘細雨讀書樓疎梅三徑半將孕鄰笛一聲相對愁便欲  
遠尋赤松子蕭然爲御闥風游

耐盡

耐盡秋風八月天  
匆匆忽已逼殘年  
熏爐苦倦乏持慣  
帶布釵荆結束妍  
雪色上窗鐙似豆  
雞聲攪夢雨如煙  
晏安何日空垂涕  
勸我修名賴汝賢

春夜聽雨

濃雲若霧暮淒淒  
斗室孤檠影欲迷  
古寺僧敲將破磬  
夜窗人聽早鳴雞  
江空寒雨添新漲  
春冷梅花卧故蹊  
昨過南關看遠色  
向風驛馬自長嘶

七夕

誰驅一夕烏鵲去  
願助雙星雲雨歌  
月夜更誰憐織女  
人間何處不天河  
楓江蒼莽悲秋士  
蟬館淒清怨素娥  
修到



神仙也離別曝衣樓上恨如何

以詩催茉莉

花田十里夢中看夢醒鐙殘春色闌  
難得東風遞花信小樓獨坐五更寒

經舊遊處

一晴一雨黃梅節輕暖輕寒白紵衣  
彈指三年舊遊處不堪回首柳依依

沅湘耆舊集卷第一百六十

新化鄧顯鶴湘臯編輯

湘陰左宗植仲基校訂

朱恩貢怡鉅

六首

怡鉅字寶田武陵人嘉慶中恩貢生有寶田詩  
草寶田爲硯北先生之孫余主講朗江書院時接  
輯楚西各家詩其子億沼以一冊來求選爲採入  
數首殆猶不失朱氏門風也

立秋日登舟有感

西風吹禾稼農畝報秋成村前與村後已聞打稻聲野人  
三時力卽此獲豐盈笑我守石田一硯終歲耕經史雖蓄

畚果腹爲虛名平居不適志橐筆五溪行

季女處中閨鍼綫聊自依鄰家致殷勤相倩成嫁衣唯諾  
重成命寸心終與違爲君裁羅紵拋我七張機蛾眉容易  
得黃金世所稀醫得眼前貧疇云行計非

醉後

何事先生賦子虛嘯歌都是涕零餘英雄潦倒乃如此莊  
列文章恐不如過隙白駒原傳舍埋憂黃壤亦違廬一編  
痛飲拈紅豆香草靈均合配渠

丙子重陽日簪頭對菊漫吟

喚醒西風夢一場芒屨依舊到山莊已非定遠封侯骨且  
入淵明買醉鄉三徑花容爭爛漫一分秋色費平章佳辰

不展登高會，奠酒蕭齋引興長。

分苗荷鋤趁春時，炎夏澆畦不告疲。猶慮出山成小草，果  
堪盈把採東籬。羞隨桃李非無豔，傲立霜天獨有姿。晚節  
畱香供白賞，花前聊誦魏公詩。

金英簇疊亦繁華，位置盈山翠檻遮。春色已拋詞客夢，秋  
光合讓野人家。紙屏瑟瑟香侵月，書幌深深酒泛霞。借汝  
芳銜稱小隱，繩牀經卷是生涯。

康歲賁曾城 十二首

曾城字夢闌，一字麋浦衡山人。嘉慶中貢生，有椿

桂堂詩集

空齋

棲鳥拂檐過空齋萬籟靜秋風增暮寒颯颯鐙焰冷寂寞  
念生平紛紜不堪省滌垢良獨難從善苦不猛蹉跎東逝  
波僂僂西留景兀兀何所言草蟲號夜永

秋日入山尋隱士

微雨霽次寥廓蘿上危阪極目何蕭條輕陰被層巘雲隙  
樹如浮天際峯猶蹇蟋蟀草閒鳴蕙蘭芳已晚欲問巖巒  
人草堂知近遠

同人擬風林纖月之題作此應之

連峯下頽陽纖月挂孤影薄光散疏林微白澹重嶺迢迢  
河漢明滅槭梧凋靜皓露滴殘聲薰風送餘冷棲鳥時一  
鳴流螢光自炳顧此有遠懷斂躁百營屏寤寐矢弗過鐙

關夜已丙

采豆行

去歲之旱吾村中除一二足穀翁皆不能足食閒有不  
舉火者今年多種麥黃豆爲屑煮之人皆黃瘦康子哀  
之作采豆行以俟觀風者時丁未五月下旬也

朝出采豆完持歸煮作糜今年米價甚昂貴此豆雖少能  
療饑釜中豆泣婦亦泣三日未炊鍋漏汁傾豆塗甕粗補  
完再蕤薪條釜邊立分羹那足饜腸腑收汝眼中淚如雨  
試出門前望高處幾處炊煙出鄰戶

山居雜景

曲折如盤谷橫空積翠分泉飛三徑雨門掩一溪雲北牖

餘蛟穴南鄰是鹿羣四時風景異塵俗未曾聞  
窗外鳴黃鳥幽人尙自眠開爐挑活火煮茗汲寒泉池草  
滋新露山花媚曉煙東園茶筍會佳釀足流連

夏日村居

邇歲心初逸安知夏日長殘虹收暮雨野犢臥斜陽短葛  
依松坐清琴待月張曲終寂無語零露溼衣裳

春社

桑條初甲杏初滋正值村民祭社時竹葉杯殘歌乍闌桃  
花飯熟雨來遲鄉人那識陳丞相田父誰邀杜拾遺藟足  
川原歸向曉新詩剛出董生帷

譚敬修還儒經共故寺有作因以寄之

僻靜新峯厠小溪

原注諱原居新峯庵

浪仙曾此寄幽棲牆陰草綠

空蛛網石徑花開自鳥號別久未諳羊子學家貧應斷范公藎慧雲不識山僧去猶繞禪堂嶺樹西

### 投宿廖元亭家

雨急風寒野色昏夜深投宿到孤村山中黃葉皆辭樹谷裏清聲欲鬪門近事艱難新漂母主人家世舊王孫悵大庾蒙莊語今後追尋仔細論

### 山亭

坳裏飛簷對畫屏斷峯缺處補天青孤雲一角波雙槩記得西湖第六亭

### 初夏



四月方塘燕子飛楊花落盡鰕魚肥閒鷗野鷺如相識又  
逐漁船過別磯

龍歲貢章十一首

章字我甫一字蘭軒湘鄉人嘉慶中貢生有蟲吟  
草湘鄉龍氏明季有季霞簡卿者皆一時名宿也  
均見資江舊集我甫當卽其後

遊觀音庵

夕陽忽西暝明月出其東飛光散林薄蕭然萬景空愛此  
招提境幽意誰與同涼風自西來清露滴梧桐無言萬慮  
息獨坐思皎公

日暮

川原廣以寬道路阻且長片月爭晚照驚風動斜陽村落  
各茅屋煙火隔鄰牆寒林自雞犬荒草足牛羊衮衮通衢  
閒行色暮蒼黃旅人間卽次處者安其常

懷古詩

大道無方隅所見各有云昌黎尊孟氏性以三品分文成  
致良知用兵乃如神讀書期實用紙上徒空文紛紛字句  
閒何足議疵醇

題易嘯溪先生墨竹

先生鄉賢之子孫手執鸞尾拂輕塵景靈畫壁雖已矣翠  
枝夜掃南山雲寒梢萬個披月影石上流泉徹骨冷無端  
筆底起清風山雨蕭蕭秋意靜當年 禁籞寫幽姿

高宗皇帝曾題詩東坡有筆在君手恍似瀟湘坐對時鼎  
湖龍去奎文在蒼翠年年長不改自荷天朝雨露恩豈  
獨淋漓泣真宰一幅生絹清如許神光彷彿迴龍馭不  
隨玉匣葬昭陵恐妨飛上青天去

寄月公上人

我契惟一理公入不二門浮生本穿鑿是非安足論駐錫  
懸帳渾閑事此妙原不闕語言白馬馱經演三乘布地施  
金開祇園如是我聞豈闕開要令苦海脫煩惱酌水南來  
米熟未早有弟子知風幡嗟余已被儒冠誤欲謝尼宣奉  
世尊自求解脫誰縛束塵情不斷愁心猿世路有如蛇在  
非事誰何異雀飛盤佛本在心心卽佛坐空四大窺本原

夙抱禪悅落塵網聚首何當共寒暄祇今大地生意足春風徧地花枝繁拈花微笑花不語請放花枝尋夙根

過鄧得遇流寓處

原注志載宋義學地今新學宮卽其故處其死節赴水事具見史乘

世運將終臣節苦高牙大帥作降虜宋帝降封瀛國公二王遠竄福州府惟公仗節炳日星手斬叛將鬻旂鼓此身義不甘再辱勢窮就死得其所千秋論定有公評百歲光陰亦逆旅當時彌望戰塵昏何處更覓乾淨土偶然寄跡在湘濱便與屈子同千古欲慰當年泉下魂當思紙上臨終語要期忠孝作完人莫漫將身列鬻序書舍學宮尙儼然過此悲歌淚如雨

齒落

去年齒牙動今年齒牙落一落不復生徒口如空壑當其  
欲落未落時颼車之動痛難持一齒已落衆齒危山頭城  
壞誰能支惻惻復惻惻我爲長太息已笑開狗竇難免惜  
雞肋况復生平喜講論談笑可以卻千軍寄言天下利齒  
兒吾齒雖落舌尙存

對鏡

大造原無補浮生豈有因已驚吾喪我試問爾何人老去  
鬢眉古狂來面目真但須勤拂拭切莫受埃塵

宿荆峯

到此卽無夢胸懷愈灑然是誠離垢地已得少光天竹簟  
飄滿瓦松風響澗泉夜深高臥處星斗滿窗懸

嶽麓

古道紆盤上林深鳥不喧山形蟠地出江勢抱城吞沈杜  
題名在朱張講學尊更尋方外侶重與證風旛

哭婦兄鄧雲臺

年時猶記話寒溫爐火紅深語夜昏衛玠未曾依樂廣信  
陵端不負平原誰知東道言歸日便是西州涕淚門望斷  
雲山何處哭驚風虐雪冷消魂

東風全不管春葩落盡籬邊姊妹花

自注丙子下世後已陳氏姨亦相繼逝

憾大雷無寄語更誰香茗念才華人閒歡會長離別天上  
神仙久怨嗟莫把麻姑比牛女幾曾得到蔡經家

唐孝子世暉二首

閒以孝子旌孝子爲竹谷茂才開韶之父竹谷  
余舊所識也嘗輯湖南詩徵未成聞余徵刻耆舊  
集亟投伯經詩一冊爲選入二首

桃花源詩卽次陶集元韻

百年塵網中蝸角有身世歲月如川流轉瞬卽東逝卻羨  
仙佛荒機心斬然廢長生與無生兩處任所憩芝草及菩  
提親手勞樹藝朱橘納輕租黃柑輸薄稅苓龜取若生杞  
枸收能吠椰酒醉天釀椰麵飽天製有時慕仙源聊爲被  
褐詣旌旻同瞿仙溯洄春水厲古辭躡千年靈藤攀萬歲  
既遇黃髮翁古愚邁今慧水止心太平超然比法界可笑

迷途中人皆有覆轍往返尋桃花想到浮雲外永與上皇  
民結爲膠漆契

大劫移千春浩浩闔人世日月馳雙丸東出還西逝有物  
何其中卓立堅不廢闔闔同乾坤流行無稍憩乃有赤松  
徒慧根多宿藝高蹈逃祖龍于焉此駕稅耕牛絕吳喘守  
犬泯蜀吹大婦善流黃小婦嫌新製家家養天倪出門無  
所詣詩書存古本研誦志恆厲緬懷王母桃花實三千歲  
食者能長生還能增知慧卻嫌弱水深中判仙凡界曷若  
桃花源只有青山蔽有時露消息直到桃花外誰爲有心  
人到此尋真契

胡布衣士迪

二首



沙洲先生集卷之二十一  
士迪字吉盦武陵布衣著有蕙圃詩集余未識布  
衣其子公輔亦詩人也嘗從余遊以蕙圃詩一冊  
求選爲錄二首

初度

六十光陰醉裏過每因興到便吟哦  
天憐馬齒身猶健詩束牛腰稿漸多  
漫道以閑爲自在可能將壽補蹉跎  
算來甲子今初度一事無成奈老何

小築憩園寄此身圖書滿架久忘貧  
名花多種堪娛老俗慮全刪庶葆眞  
差喜素心存故我敢將白眼看他人  
從茲把卷消閑日散髮長爲鄉里民

張秀才際雲一首

際雲宇松巖自號眞吾子常寧人諸生有與吾子

詩草

夜雨

一天風雨夜迢迢點滴空階聽寂寥自是多愁眠不得銷  
嫌門外有芭蕉

楊秀才雲松

十八首

雲松字升之一字鶴臯自號竹愚居士湘潭人增  
生年二十二以羸疾卒有竹舫小草四卷其師黃  
淦序之反覆愴歎以爲第令數十年間尙有知鶴  
臯其人者卽可以不死又謂鶴臯可以不死僅在  
此數卷詩重慮其才與學未極其至未知數十年

後果能必其不死否余感其言爲過存十餘首鶴  
臯或可以不死矣

田家雜興

鳩鳴穀雨晴櫻桃紅半墅柳葉陰前門菜花黃小圃  
瓦鼓宜春酒約雞黍既不出朝市於焉老邱渚山色  
壓茅檐溪聲雜林杵野夫慣力作悠然寡營取

東田寬春水澗彼西田腴秧青鵝鵝飛衆木繁我居  
行看上已近夾道明青榆驅犢下壠坂小憩田中廬  
農事日忙荷鋤遙相呼曳杖獨徘徊山鳥催提壺

茅屋八九家少小各相識努力事耕耨禾黍同一色  
四月蝨蟧鳴白鷺矯新翼耘苗日以長邨歌答不息  
南風吹柳

花冉冉香溪側雨過雷聲平虹明日脚直連邨吹煙晚熟  
藜各歸食

朝日猶未出稻香繞柴關瓜棚露氣清埜鶴如我閑攜鋤  
看渠水魚戲藕花閒稚子驅烏犢竹笛來前山路逢野老  
言歲儉物力艱行將採苧葛石磴尚可攀績成大布衣亦  
得錢衰顏

歲無旱潦憂家安畝畝樂秋氣從西來黃雲遍郊郭嫋嫋  
涼風生時至皆刈穫平疇響耒板野田飛黃雀行當具租  
稅及早輸京洛州縣追呼吏無由至邨落里俗樸且淳未  
識人心薄

鴻雁日已來芙蓉日已老寒蛸咽疏梧槐花明古道夜來

星斗高爽氣入懷抱場圃散清暉月到中秋好蟋蟀鳴空  
階風露滋幽草旦暮計寒衣嬾婦驚心早

苦竹曲編籬稻草新縛屋環村老樹多時見羣鷄宿小犬  
喜相隨老牛親自牧朔風鳴枯枝寒日馳北陸願偕昔遊  
侶逢場戲竿木採藥入危峯上下雲相逐

舊栽梅作花新種竹成畝歲晏罕人事悅我平生友團鑪  
煮續茶閒甕試新酒小婦解持家雛兒初學走雖未廣田  
園而多植棹柳峭寒入荆扉積雪明松牖談笑無束縶陶  
然飲一斗謀生樂有餘借問人知否

青塘

不見青塘路言尋荒草原亂山含夕照一水抱孤村野老

出迎客田家多閉門桃花新雨過我欲問仙源

池南雜興用工部何將軍山林韻

小萍池南宅門依舊板橋溪聲迴斷峽峯勢插晴霄山水  
緣長結邱園隱易招平生耽野趣頗愛世塵遙

別有清虛境層軒面水開一林風解籜三月雨迎梅似與  
仙源接曾無俗客來藤陰將葢瓦低護半弓苔

鑿石通幽澗連筒納沃泉平渠波展鏡夾岸柳飛絲射鴈  
青絲繳沽春白打錢雅遊吾未倦乘興過前川

塵氛不復到日日對清池笑倚烏皮几長歌白接羅野簞  
生竹母新釀熟鷺兒得意獨行樂閒看影共隨

社日

枳籬茅舍小煙邨十里花香恰到門白髮幾人談出處青  
山長白樂雞豚地多舊姓衣冠古里有仁風齒德尊桑柘  
影濃歌舞罷家家攜得酒盈樽

初夏書懷

老屋常依水竹居蕭然吾亦愛吾廬綠陰滿院倚吟榻斜  
日半窗鈔古書高士情懷參佛老野人蹤跡半樵漁花畦  
石嶼恣遊處都是春前佈置餘

小立

葛衣乍試愛新晴小立闌干分外清病後看書多妙解夢  
中得句有奇情開門漸覺琅玕長帖水初憐菡萏生一幅  
齊光新製就放翁心跡此閒明

張謙庵以詩集見貽復和予送春詩賦此奉懷

牛腰詩卷足風流更值瑤箋一幅投  
鐵笛銅琶參古調美人香草續離憂  
關心世路誰青眼回首名場半白頭  
手指昭潭千尺水遲君同唱大江秋

山行

莎徑穿林橫杓畧白雲忽擁一峯平  
竹雞唳罷山雨歇桐子花開溪水生

毛秀才元煒一首

元煒字月舫長沙人諸生性穎異豪放少有神童  
之目偃蹇不遇卒以酒死遺稿散佚僅得一首爲  
稍刪節存之



桃花源行

昔聞桃花源乃在人世外桑麻半荒忽雞犬亦靈怪中有  
避秦人冥漠迷宙界遂疑有爲無不辨塵與芥豈知淵明  
寓言非寓言江山到手眞桃源君不見滇黔東走八千里  
辰山橫亘洞庭水其中千巖萬壑高極天懸峯絕磴紛鈎  
連惡灘槎枒黑雲沸山鬼叫嘯青冥顛神靈往來光倏忽  
轟訇雷雨蛟虬鞭黃茆深箐蠡蠡宅狔獠跳擲如狙猿天  
荒地老萬萬載然後扶輿積氣鬱久始一洩屹爲迴環層  
疊之靈山滙爲漣漪紆帶之清淵世人牛馬爭聲利何暇  
蠻荒討幽異直將靈奇恣恍蹤判爲放誕虛無事我來桃  
花溪行訪桃源洞清江平遠人煙稀碧浪參差鏡光動漁

月時見幾綢懸幽篴忽聞一鳥啼水荳姬姘飛英香綠蘿  
十幅雲錦張隨流詰屈遠近忘劃然靈境開鴻荒且繫煙  
中艇行騰縛雙脛茅屋陰陰帶桑柘水田漠漠交畦町攜  
籃村婦遵微行驅犢山童轉峯頂見客相錯愕禮數無差  
等各有泉石氣地僻心自迴逶迤犂确蹊徑斜亂紅開盡  
山桃花竹雞初曉林雨過松鼠低竄黃藤遮清泉百道漱  
寒雪怪石千笏凌飛霞一綫測天劃窺窺二分側足穿谿  
筍羊腸盤行入山腹四圍逼側山如屋天高日午無鳥聲  
滴瀝泉音下空谷瞿童丹竈委榛蕪斷碣殘碑倚叢竹吁  
嗟乎高陵下谷多變遷前人住此非神仙火耕漁隱五百  
年不知漢魏相襲沿如今混沌既穿鑿縣官時索輸租錢

江山未改人事易何況滄海爲桑田徘徊日落西山脊四  
山雲起長天碧蒼煙暝鎖洞門深不信中無赤松客

劉秀才尙藻一首

尙藻字東井長沙人諸生

送毛月舫之巴陵

瑟瑟枯蘆響不停嗷嗷孤雁更難聽故人一棹斜陽外飽  
載秋聲過洞庭

賀國子允璧二首

允璧字荆山常寧人監生有竹蔭山齋遺草

紫雲山古松

樹古山尤古難詢種樹人何年招鶴伴歷劫化龍鱗未覺

賢眉老猶存面目真蒼蒼雲徑裏閱遍幾長春

### 落山道中

閱世烽煙息

自注勝國末曾立砦于此地

荒村驛馬停碑分三縣古

注

有碑分寧遠祁陽常寧三縣界峯見九巖青出界諳鄉語經過憩客亭徘徊斜照裏何處酒盈瓶

楊處士之泗

三首

### 之泗字魯英寧遠人

戊辰八月攜兒子繩綸重遊浯溪并繪圖紀勝

春潭一艇隨漁翁浯溪曾訪摩崖蹤屈指先君勝遊地往事卅載如飄風佳山活水性所喜每遇絕境開懷胸茲來重訪心顏爽石鏡一片涵長空兒曹終歲守章句未解兩

步瀛集卷之六  
四  
展攀龍從歷歷教識舊碑字上有漫叟兼顏公銘詞俊偉  
字畫古浩氣凜凜凌蒼穹文章節義本一致詎以小技誇  
奇工嗟我逡巡負前志自念老大非兒童追思舊境發迢  
慨并少妙句供磨礪欲題名姓識誰某歲久恐半荒煙叢  
生絹一幅聊寄意時一展翫心無窮莫教傳入好事手直  
恐變幻隨飛鴻

春陵侯墓

不放樵蘇近墓門一杯原是漢王孫真人白水中興兆古  
道秋風落照痕深夜漆燈猶自出前朝竹簡詎堪論晁生  
徒作苞桑計回首長陵草色昏

潛溪題壁

三十年前此地過扁舟重訪舊煙蘿雲山韶馥無窮意輪  
與漁郎領畧多

楊秀才象綸

一首

象綸字雲卿寧遠人諸生

逍遙巖

出郭纔三里巖幽費討尋徑隨黃葉亂門掩翠雲深縹緲  
通仙境逍遙暢道心誅茅何日遂到此足開襟

吳國子山秀

一首

山秀字廷選常寧人監生有鑑古堂詩草

山居

山居無一事贏得此身閒巖石無今古溪雲任往還殘星

明遠浦秋果落空山小院松風靜柴門夜不關

吳成楚 一首

成楚字雲巖常寧人有靜安軒詩草

過田家

更尋山外去幾折白雲灣犬吠知村近牛眠識夏閑芳塍  
田婦業古鐵野人顏蕩蕩義皇世淳風遇此閒

王國典 一首

國典字微之常寧人

過洞庭

洞庭之山無地立洞庭之水與天齊伊誰朗吟輕飛鶴予  
亦泛棹隨輕鷺但有波濤遶日月曾無邊際認東西若山

一點猶在望何處湘靈帝子號

羅世鎮 二首

世鎮字靜渠長沙人有囊中小草

霽

郊原新霽後池水亂流閒落日斜窺樹歸雲不滿山老僧  
扶杖出野老荷鋤還爲問田家事柴門鎮日關

春郊晴望

春陰霽色換崇朝天迴晴郊四望遙村外亂流添作渡巖  
邊崩石自成橋風銷薄霧開山面煙抹斜陽護柳腰挈榼  
攜柑人雜還旗亭相望有誰招

黃運隆 一首



運隆字景園寧鄉人

唐陶山先生重修六如居士祠墓紀事

狼籍名花陌上塵  
茅庵草色幾番新  
吳門儘有吹簫客  
荒隴誰憐賣畫人  
酌酒尙畱金粉地  
焚香堪證去來身  
天桃分得河陽種  
綰住江南二月春

黃明昌 一首

明昌字勲臣自號松崖山人郴州人有秋窗吟

尋幽

尋幽偶過野人家  
一徑雲深日欲斜  
最愛門前香不斷  
幾株老樹絡藤花

沅湘舊集卷第一百六十終